



Rabu, 30 Agustus 2023

Ogen: 1 Samuel 25:28-31



NEHKEN TOTO



Kerina pemindon, arapen ras sura-sura si mehuli si belasken i bas pertoton. Mbelin kal arapenta gelah min si sikap jadi man kalak si mehuli. E maka, seh kal buena toto si ibelasken nandangi kalak si mehuli e. Apai ka ia i bas perbeben si mberat, idenden pinakit ntah pe sanga erjuang nehi sura-surana. Lit ka deba sanga ialokenna perbahanen si mehuli i bas sekalak jelma nari, toto nge ngenca si bahan jadi kesempatenta ersimulih i bas perbahanena e nari. Lit ka nge kalak si erbelas mindo gelah ia idukung i bas pertoton, subuk man perpulungen ntah pe secara pribadi.

Kuga kita i bas nehken toto enda? Enggo nge kerina kita semal nehken toto kerna kalak sideban subuk ipindona ntah lang? Ngusih kai si ibahan Abigail, i bas kai arapenna si ibahan Daud man bana e me mekuah min ate Daud man bana i bas kai si enggo jadi ibahan perbulangenna. Radu ras ibelaskenna pe arapen si mehuli kerna Daud alu nehken totona. Nina: *'tentuna ibahan Tuhan kam jadi raja. Tuhan Dibata sinjagai kam bagi njagai barang simeherga, kenca enggo isehken Tuhan kerina e, lanai pagi ia munuh alu la ersabap... kenca isehken Tuhan pasu-pasuNa man Daud, ula ia ilupaken.'* Kai siibelasken ras isehken Abigail tuhu-tuhu i bas pusuhna nari, rikut-ikut siibelaskenna ras arapenna.

Bagenda me isi pusuh Abigail, rikut ras perukuren si dem kebiaren ras sura-sura si mehuli la saja man bana ras kerina si nggeluh ringan i bas rumahna tapi pe arapenna kerna Daud. La ia egois ngukurken dirina saja ngenca, ia pe ngarap, rukur ras ertimbang arah kecibal si Daud. Tuhu pusuh si pentar. Bagenda me min kita Moria i bas rukur, ertimbang ras ngelakoken sada keputusan si mehuli guna kiniulin kerina kalak si isekelewetta.